

DITSHEBELETSO TSA LEKGETHO TSA AFRIKA BORWA**9 PHUPTJANE 2017****DIKGUTLISO TSE LOKELANG HO NYEHELWA KE MOTHO HO LATELA DINTLHA TSA KAROLO YA 25 YA MOLAO WA TSAMAISO YA LEKGETHO, 2011 (MOLAO WA NOMORO YA 28 WA 2011)**

Ho latela karolo ya 25 ya Molao wa Tsamaiso ya Lekgetho, 2011, nna, Thomas Swabihi Moyane, Khomeshenara ya Ditshebeletso tsa Lekgetho tsa Afrika Borwa, mona ke hloka hore batho ba hlwailweng Sejuleng ena e hoketsweng ba nehelane ka dikgutliso tsa selemo sa hlahlobo sa 2017, ho latela tlhaloso e ka hara Sejule, le ho latela dinako tse hlakisitsweng ka hara Sejule.

T S MOYANE**KHOMESHENARA: DITSHEBELETSO TSA LEKGETHO TSA AFRIKA BORWA**

Sejule

1. Kakaretso

- 1.1 Lereo lefe kapa lefe kapa polelo e ka hara tsebiso ena eo tlhaloso ya yona e amahanngwang le **"Molao wa lekgetho"** ho latela tlhaloso ya karolo ya 1 ya Molao wa Tsamaiso ya Lekgetho, 2011, e bolela sona seo ntle feela le ha moelelo o bolela ho hong mme mareo a latelang a bolela sena---

"selemo sa hlahlobo sa 2017" ho bolelwa—

- (a) moo ho buuwang ka khampani, selemo sa ditjhelete sa khampani eo se felang ka selemo sa khalendara sa 2017; mme
- (b) moo ho buuwang ka motho ofe kapa ofe, selemo sa hlahlobo se felang nakong ya dikgwedi tse 12 mme se fela ka la 28 Hlakola 2017; mme

"kgutliso ya lekgetho la lekeno" ho bolelwa kgutliso ya hlahlobo ya lekgetho le tlwaelehileng le mabapi le selemo sa hlahlobo sa 2017.

- 1.2 Mona ho fanwa ka tsebiso ho latela dintlha tsa karolo ya 25 ya Molao wa Tsamaiso ya Lekgetho, o ballwang mmoho le karolo ya 66(1) ya Molao wa Tsamaiso ya Lekgetho, o bolelang hore motho ya hlwailweng ho latela dintlha tsa serapa sa 2 o lokela ho nehelana ka kgutliso ya lekgetho la lekeno ka nako e laetsweng serapeng sa 4.

2. Batho ba tlamehang ho nehelana ka kgutliso ya lekgetho la lekeno

Batho ba latelang ba tlameha ho nehelana ka kgutliso ya lekgetho la lekeno:

- (a) khampani e nngwe le e nngwe, therasete kapa motho e mong eo e leng motho ho ya ka molao, eo e leng moahi;
- (b) khampani e nngwe le e nngwe, therasete kapa motho e mong eo e leng motho ho ya ka molao, eo e seng moahi—
 - (i) e bileng le kgwebisano ka tsela ya setheo sa ho ya ho ile se ka hara Rephablike;
 - (ii) e bileng le lekeno le tswang mohloding o ka hara Rephablike; kapa
 - (iii) e bileng le kuno efe kapa efe ya tjhelete kapa tahlehelo ya tjhelete ho tswa ho tlohelweng ha thepa eo Sejule ya Borobedi ya Molao wa Lekgetho la Lekeno e amanang le yona;
- (c) khampani e nngwe le e nngwe eo e hlophisitsweng, e thehilweng kapa e bileng teng ka hara Rephablike empa e se moahi ka lebaka la ho kenngwa tshebetsong ha tumellano efe kapa efe e bileng teng le Mmuso wa naha efe kapa efe e nngwe ka sepheo sa ho qoba ho lefa lekgetho habedi;
- (d) motho e mong le e mong eo e leng motho ho ya ka molao—
 - (i) e le moahi mme a bile le kgwebisano efe kapa efe (ntle le eo a e entseng ka boyena feela jwalo ka mosebetsi); kapa
 - (ii) e se moahi mme a bile le kgwebisano efe kapa efe (ntle le eo a e entseng ka boyena feela jwalo ka mosebetsi) ka hara Rephablike;
- (e) motho e mong le e mong eo e leng motho ho ya ka molao—
 - (i) ya lefilweng kapa ya fuweng tjhelete ya tlatsetso (alawense) kapa e lefelletsweng pele ho latela tlhaloso ya karolo ya 8(1)(a)(i) ya Molao wa Lekgetho la Lekeno (ntle le bokaalo bo buseditsweng kapa bo lefelletsweng pele ho latela tlhaloso ya karolo ya 8(1)(a)(ii) mme lekeno kaofela pele ho ditloso le fetileng meedi e behilweng ho (ix);
 - (ii) ya nehilweng molemo o lefisiwang lekgetho ho latela tlhaloso ya serapa sa 7 sa Sejule ya Bosupa ya Molao wa Lekgetho la Lekeno mme lekeno kaofela pele ho ditloso le fetileng meedi e behilweng ho (ix);

- (iii) e le moahi mme a na le dikuno tsa tjehelete kapa ditahlehelo tsa tjehelete tse fetang R40 000;
- (iv) e se moahi mme a bile le kuno ya tjehelete kapa tahlehelo ya tjehelete ho tswa ho tlohelweng ha thepa eo Sejule ya Borobedi ya Molao wa Lekgetho la Lekenno e amanang le yona;
- (v) e le moahi mme a bile le matlole afe kapa afe a mofuteng wa ditjehelete tsa matjhaba kapa e le monga thepa efe kapa efe ka ntle ho Rephablike, ebang paloyohle ya boleng ba matlole le thepa eo e fetile R225 000 mokgahlelong ofe kapa ofe ka nako ya selemo sa hlahlobo sa 2017;
- (vi) e le moahi mme eo lekeno lefe kapa lefe kapa kuno ya tjehelete ho tswa matloleng a mofuteng wa ditjehelete tsa matjhaba kapa thepa e leng ka ntle ho Rephablike e ka amahanngwang le yena ho latela dintlha tsa Molao wa Lekgetho la Lekenno;
- (vii) ke moahi mme a bile le ditokelo tsa ho ba le seabo jwalokaha ho boletsweng karolong ya 72A ya Molao wa Lekgetho la Lekenno, khampaning ya matjhaba e laolwang;
- (viii) a filwe foromo ya kgutliso ya lekgetho la lekeno kapa ya kopilweng ke Khomeshenara ka lengolo ho nehelana ka kgutliso, ho sa natswe bokaalo ba lekeno la motho ya jwalo;
- (ix) ho itshetlehlwe hodima dipehelo tsa serapa sa 3, mafelong a selemo sa hlahlobo—
 - (aa) a ne a le ka tlase ho dilemo tse 65 mme lekeno lohle la hae pele ho ditloso le fetileng R75 000;
 - (bb) a ne a le dilemo tse 65 le ho feta (empa a le ka tlase ho dilemo tse 75) mme lekeno lohle la hae pele ho ditloso le fetileng R116 150; kapa
 - (cc) a ne a le dilemo tse 75 kapa ho feta mme lekeno lohle la hae pele ho ditloso le fetileng R129 850;
- (f) ho itshetlehlwe hodima dipehelo tsa serapa sa 3, lefa le leng le le leng la motho ya hlokaletseng le neng le na le lekeno lohle pele ho ditloso;
- (g) molata e mong le e mong eo lekeno lohle la hae pele ho ditloso le neng le kentse tswala ho tswa mohloding o ka hara Rephablike mme dipehelo tsa karolo ya 10(1)(h) ya Molao wa Lekgetho la Lekenno le sa le ameng; le
- (h) moemedi e mong le e mong wa molefalekgetho wa motho ofe kapa ofe ya boletsweng diratswaneng tsa (a) ho isa ho (g) ka hodimo.

3. Batho bao ho sa hlokeheng hore ba nehelane ka kgutliso ya lekgetho la lekeno

Motho ka tlhaho kapa lefa la motho ya hlokaletseng ha ho hlokehe ho ka nehelana ka kgutliso ya lekgetho la lekeno ho latela dintlha tsa serapa sa 2(e)(ix) kapa (f) ebang lekeno lohle la motho eo pele ho ditloso le ne le kentse feela lekeno lohle (pele ho ditloso) ho latela tlhaloso ya e nngwe ya seratswana kapa diratswana tse latelang:

- (a) moputso o lefilweng kapa o lokelang ho leshwa ho tswa mohloding o le mong, mme o sa fete R350 000 mme lekgetho la mosebetsi le se le hutswe kapa le tshwerwe ho latela dintlha tsa ditafole tsa kgulo tse laetsweng ke Khomeshenara;
- (b) tswala (ntle le tswala e tswang botseteding bo sa lefisweng lekgetho) e tswang mohloding o ka hara Rephablike e sa feteng—
 - (i) R23 800 mothong ya dilemo tse ka tlase ho tse 65;
 - (ii) R34 500 mothong ya dilemo tse 65 kapa ho feta; kapa
 - (iii) R23 800 moo ho buuwang ka lefa la motho ya hlokaletseng;
- (c) di-dividente le motho ka tlhaho eo e neng e se moahi wa naha selemong sohle sa hlahlobo sa 2017; le

- (d) bokaalo bo fumanweng kapa bo hlommeng ho tswa botseteding bo sa lefisweng lekgetho

4. Dinako tseo ka tsona dikgutliso tsa lekgetho la lekeno di tlamehang ho ba teng ka yona

Dikgutliso tsa lekgetho la lekeno di tlameha ho nyehelwa dinakong tsena tse latelang:

- (a) moo e leng khampani, dikgweding tse 12 ho tloha ka letsatsi leo selemo sa ditjhelete se felang ka lona; kapa
- (b) moo e leng batho ba bang kaofela (ho akareditswe le batho ka tlhaho, ditherasete le batho ka molao jwalo ka ditheo, doboto kapa meifo)—
- (i) ka la kapa pele ho la 22 Loetse 2017 ebang kgutliso e nyehetswe ka letsoho;
- (ii) ka la kapa pele ho la 24 Pudukwana 2017 ebang kgutliso e nyehetswe ka mokgwa wa eFiling kapa ka tsela e elektronike ka thuso ya mohlanka wa SARS diofising tsa SARS;
- (iii) ka la kapa pele ho la 31 Pherekong 2018 ebang kgutliso e amana le molefalekgetho wa nakwana mme e nyehetswe ka mokgwa wa SARS eFiling; kapa
- (iv) moo diakhaonto di ananetsweng ke Khomeshenara ho latela dintlha tsa karolo ya 66(13A) ya Molao wa Lekgetho la Lekeno e mabapi le bokaofela kapa karolwana ya lekeno la molefalekgetho, tse hlophisitsweng ka mora la 28 Hlakola 2017 empa ka la kapa pele ho la 30 Loetse 2017, le dikgweding tse 6 ho tloha ka letsatsi leo diakhaonto tse jwalo di ileng tsa hlophiswa ka lona.

5. Sebopelo sa dikgutliso tsa lekgetho la lekeno tse tlang ho nyehelwa

Diforomo tse laetsweng ke Khomeshenara bakeng sa ho nyehelwa ha dikgutliso tsa lekgetho la lekeno di fumaneha ka ho di kopa ka tsela ya inthanete ho www.sarsefiling.co.za kapa ho tswa ofising efe kapa efe ya SARS, ntle le ofisi e shebaneng feela le merero e mabapi le tsa bolaodi ba thepa meeding.

6. Tsela ya ho nyehelwa ha dikgutliso tsa lekgetho la lekeno

Dikgutliso tsa lekgetho la lekeno di tlameha—

- (a) moo e leng khampani, di nyehelwe ka mokgwa wa elektronike ka tshebediso ya mokgwa wa SARS eFiling; mme
- (b) moo e leng batho ba bang kaofela (ho akareditswe le batho ka tlhaho, ditherasete le batho ka molao jwalo ka ditheo, doboto kapa meifo), di—
- (i) nyehelwe ka mokgwa wa elektronike ka tshebediso ya mokgwa wa SARS eFiling ha feela motho a ingodiseditse eFiling, kapa ka mokgwa wa elektronike ka thuso ya mohlanka wa SARS ofising ya SARS;
- (ii) rometswe ka poso ho SARS;
- (iii) isitswe ofising ya SARS, ntle le ofisi e shebaneng feela le merero e mabapi le tsa bolaodi ba thepa meeding; kapa
- (iv) di romelwe dibakeng tse ding tse jwalo tse kgethilweng ke Khomeshenara nako le nako.